

- प्रधानमंत्री नरेन्द्र मोदी जम्मू-कश्मीर मांय चिनाब पुल अर अंजी पुल रो उद्घाटन कीना-कह्यो-देश अब कश्मीर ऊं कन्याकुमारी ताई रेल ऊं जुड़ ग्यो है।
- वंदे गंगा जल संरक्षण-जन अभियान रा तैत आज प्रदेशभर मांय श्रमदान रा कार्यक्रम राख्यी ज्या।
- देश मांय वक्फ़ सम्पत्तियां रा पंजीकरण अर प्रबंधन मांय साफ़गोई सारु उम्मीद पोर्टल सुरु करी ज्यो।
- नीट-पीजी 2025 परीक्षा तीन अगस्त ने एक पारी मांय ली जावेला।

000

प्रधानमंत्री नरेन्द्र मोदी आज जम्मू-कश्मीर रा कटरा मांय चिनाब पुल अर अंजी पुल रो उद्घाटन कीनो। ई मौके वे कह्यो के देश अब कश्मीर ऊं कन्याकुमारी ताई रेल ऊं जुड़ ग्यो है। श्री मोदी 46 हजार करोड़ रुपया ऊं बत्ता खर्च वाळी विकास री केई परियोजनावां रा काम री नींव रखी अर पूरी व्ही परियोजनावां जनता ने संपी। श्री मोदी कह्यो के जम्मू-कश्मीर रो विकास भारत रा एका रो ऐलाण है।

000

प्रधानमंत्री कह्यो के पीर पंजाल री मुश्किल पहाड़ियां मांय बणायी ज्या चिनाब अर अंजी पुल भारत रा इंजीनियरिंग बूता री जीती-जागती निशाणी है। वे कह्यो के कश्मीर रा सेब अब कम खर्च अर कम बगत मांय देशभर रा बाजारां ताई पूग सकेला।

000

भारतीय रिज़र्व बैंक रेपो रेट मांय 50 आधार अंकां री कटौती रो ऐलाण कीनो है। आरबीआई रा गवर्नर संजय मल्होत्रा आ जाणकारी दीनी। लगातार तीजी दफ़ा कटौती पछे अब रेपो रेट साढ़े पांच फीसदी रह ग्यी है। आर.बी.आई रा ई फैसला ऊं कर्ज सस्ता व्हेवण रा आसार है। ई सागे ई तरलता समायोजन सुविधा-एल.ए.एफ़ रा तैत स्थायी जमा सुविधा-एस.डी.एफ़ री रेट सवा पांच फीसदी रा लेवल माथे राख्यी ज्यी है। सीमांत स्थायी सुविधा-एम.एस.एफ़ अर बैंक रेट पौने छः फीसदी रा लेवल माथे समायोजित करी ज्यी है। नकद आरक्षित अनुपात सीआरआर मांय ई सौ आधार अंकां री कटौती करीजी है। इण ऊं बैंकिंग सिस्टम मांय अढाई लाख करोड़ रुपया आवण री उम्मीद है, जिण ऊं तरलता मांय बधोतरी सागे कर्ज लेवणो आसान व्हेला।

000

प्रदेश मांय चलायी ज्या वंदे गंगा जल संरक्षण-जन अभियान रा तैत आज श्रमदान रा कार्यक्रम राख्यी ज्या। ई दौरान जल स्रोतां री सफ़ाई अर मरम्मत रा काम करी ज्या। झालावाड़ ज़िला मांय पाणी री न्यारी-न्यारी ठोडां साफ़-सफ़ाई करी ज्यी। चूरू मांय सेठाणी जोहड़ माथे जल पूजन कर र करी ज्या श्रमदान मांय मोटी तादाद मांय जनता शिरकत कीनी। अजमेर, हनुमानगढ़ अर बांसवाड़ा समेत न्यारी-न्यारी ठोडां पाणी री उपयोगिता बधावण अर सफ़ाई व्यवस्था मांय सुधार सारु न्यारा-न्यारा महकमां री ओर ऊं मिल र अभियान चलायी ज्यो।

000

मुख्यमंत्री भजनलाल शर्मा आज जयपुर रा दुर्गापुरा टेशन ऊं राजस्थान वाहिनी भारत गौरव पर्यटक ट्रेन ने हरी झंडी बता र रवाना कीनी। वरिष्ठ नागरिक तीर्थ यात्रा योजना रा तैत चलायी ज्यी ई गाड़ी ऊं आठ सौ तीर्थयात्री रामेश्वरम् अर मदुरै री यात्रा करेला। आठ दिन री ई यात्रा मांय रामेश्वरम् रा न्यारा-न्यारा मिन्दरां सागे मदुरै रा नामी मीनाक्षी मिन्दर रा ई दर्शन कर्या जा सकेला। ई मौके मुख्यमंत्री कह्यो के सरकार बुजुर्गा सारू आसान तीर्थयात्रा रा प्रबंध कीना है।

000

राज्यपाल हरिभाऊ बागडे आज सिरौही मांय जिला स्तर रा अहलकारां सागे मीटिंग कर र वठे कराया जा रहया विकास रा कामां रो जायजो लीनो। मीटिंग मांय जिला कलेक्टर अल्पा चौधरी अर एस.पी. अनिल बेनीवाल समेत केई आला अहलकार मौजूद रहया। राज्यपाल रो काल चित्तौडगढ़ रा दौरा रो कार्यक्रम है।

000

क्षत्रिय युवक संघ रा संरक्षक भगवान सिंह रोलसाहबसर रो आज जयपुर मांय दाग कर दियो ज्यो। मोटी तादाद मांय लोग वां ने आखिरी विदाई दीनी। इण ऊं पैली वां री पार्थिव देह जयपुर रा संघ शक्ति कार्यालय मांय दर्शन सारू राख्यी ज्यी। मुख्यमंत्री भजनलाल शर्मा फूल चढ़ा र वां ने सिरधाभाव सागे याद कीना। रोलसाहबसर रे देवलोक व्हेवण परां उपमुख्यमंत्री दीया कुमारी, कैबिनेट मंत्री राज्यवर्धन सिंह राठौड़, केंद्रीय मंत्री गजेंद्र सिंह शेखावत, अर्जुनराम मेघवाल अर भाजपा प्रदेश अध्यक्ष मदन राठौड़ समेत केई नेता अर हस्तियां दुःख जतायो है। ध्यानजोग है के लारला दिनां ऊं मांदा रोलसाहबसर मोड़ी रात जयपुर रा एसएमएस अस्पताल मांय आखिरी सांस लीनी ही। वे समाज रा भला सारू लम्बा बगत ताई काम कीनो।

000

अल्पसंख्यक कार्य मंत्री किरेन रिजिजू वक्फ सम्पत्तियां रा पंजीकरण अर प्रबंधन मांय साफगोई लावण रा मकसद ऊं आज उम्मीद पोर्टल री सुरूआत कीनी। उम्मीद रो मतलब **संयुक्त वक्फ प्रबंधन, सशक्तिकरण, दक्षता और विकास अधिनियम, 1995** है। ई पोर्टल माथे वक्फ सम्पत्तियां री जाणकारी दी जावेला।

नुवा वक्फ रा रजिस्ट्रेशन सारू अर्जियां ई ई पोर्टल रे जरिये दी जा सकेला। वक्फ सम्पत्तियां री ऑडिट रिपोर्ट रो ई पोर्टल माथे दरसाव कर्यो जावेला। ई मौके रिजिजू कह्यो के उम्मीद पोर्टल वक्फ संपत्तियां रा प्रबंधन री दक्षता बधावेला।

000

प्रधानमंत्री नरेन्द्र मोदी री अगुवाई वाळी केन्द्र सरकार रा कामकाज रा 11 साल 9 जून ने पूरा व्हे रहया है। आ प्रधानमंत्री रा तौर ऊं श्री मोदी रा तीजा कार्यकाल री पहली वर्षगांठ व्हेला। ई दौरान देश न्यारा-न्यारा हलकां मांय विकास रा नुवा आयाम हासिल कीना है। श्री मोदी सोशल मीडिया पोस्ट मांय मांड्यो के लारला 11 साल मांय सरकार रो हर जतन सेवा, सुशासन अर गरीबां रा भला ने समर्पित रहयो है। केन्द्र सरकार री उपलब्धियां अर योजनावां ऊं मोटी तादाद मांय किसानां ने फायदो व्हे रहयो है। भीलवाड़ा जिला मांय कांदा री खेती करण वाळा किसान शंकर लाल शर्मा कह्यो के सरकार री जनता रा भला री नीतियां ऊं काश्तकारां ने टेमसर खाद-बीज मिल रहया है अर सब्सिडी री रकम ई सीधी खातां मांय भेजी जा रही है।

000

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलायी जा रही है। आज पेश है जयपुर रा राष्ट्रीय आयुर्वेद संस्थान मांय योग अर स्वस्थ वृत्त विभाग रा सह-आचार्य राहुल पाराशर रो संदेश। वां रो कहवणो है के योग जिन्दगी ने पूरी बणावे है।

000

प्रदेश रा खान धारक लीज रा बारा मांय अब ऑनलाइन तरीका ऊं जाणकारी ले सकेला। खनिज प्रक्रिया ने साफगोई सागे चलावण अर आसान बणावण सारू आ पहल करीजी है। और ब्यौरो समाचार कक्ष ऊं म्हाणी प्रतिनिधि ऊं –

000

नीट-पीजी 2025 परीक्षा तीन अगस्त ने एक पारी मांय करायी जावेला। सुप्रीम कोर्ट नेशनल टेस्टिंग एजेंसी ने आ परीक्षा करावण री मंजूरी दे दीनी है। पैली आ परीक्षा 15 जून ने करायी जावणी ही। एजेंसी परीक्षा करावण सारू दो महीना ऊं बत्तो बगत मांगण सारू तीन जून ने समय बधावण री मांग करता थकां एक अर्जी दाखिल कीनी ही। इण मांय परीक्षा केंद्रां री तादाद दुगणी अर हिफाजती इंतजामात् कर री जरूरत बतायी ज्यी ही।

000